



Broj: 01- 434 /25

Sarajevo: 21. 4. 2025. godine

PREDSTAVNIČKI DOM

PARLAMENTARNE SKUPŠTINE BOSNE I HERCEGOVINE

n/r predsjedavajućeg

Šemsudin Mehmedović

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
S A R A J E V O

PRIMLJENO: 21-04-2025			
Organizaciona jedinica	Klasifikaciona oznaka	Redni broj	Broj priloga
01	50-1	1006/25	

U skladu s čl. 170. i 171. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19 i 53/22) postavljam sljedeće

**ZASTUPNIČKO PITANJE ZA
MINISTARSTVO PRAVDE BOSNE I HERCEGOVINE**

Zašto Ministarstvo pravde, ni skoro tri mjeseca nakon usvajanja, nije postupilo u skladu sa Inicijativom Predstavničkog doma Parlamentarne skupštine Bosne i Hercegovine (akt broj: 01-50-1-15-25/25, veza: 01-50-1-96/25 od 23. 1. 2025.), dostavljenom Vijeću ministara Bosne i Hercegovine 28. januara 2025. godine i preduzelo mjere, u skladu s članom 63.a stav (4) Zakona o državnoj službi u institucijama Bosne i Hercegovine, protiv Marka Kubatlije, direktora Agencije za unapređenje stranih investicija (FIPA-e), rukovodećeg državnog službenika koji je na lokalnim izborima 2024. godine bio nosilac liste kandidata Demokratskog narodnog saveza za Skupštinu Opštine Pale, a danom potvrđivanja kandidature, iako je bio dužan, nije dao ostavku na mjesto direktora FIPA-e, čime je prekršio Izborni zakon Bosne i Hercegovine i Zakon o državnoj službi u institucijama Bosne i Hercegovine?

Tražim da mi Ministarstvo pravde Bosne i Hercegovine dostavi mišljenje koje je pripremiло za Vijeće ministara Bosne i Hercegovine o slučaju „Marko Kubatlija“, u skladu sa zaključkom Vijeća ministara donesenim na 71. sjednici, održanoj 20.2.2025. godine (akt broj: 05-07 -1-345-18/25 od 3.3.2025.).

Obrazloženje

Predstavnički dom Parlamentarne skupštine Bosne i Hercegovine je na 25. sjednici, održanoj 23. januara 2025. usvojio zastupničku Inicijativu Šemsudina Mehmedovića (akt broj: 01-50-1-15-25/25; veza: 01-50-1-96/25 od 23. 1. 2025.), kojom je obavezao Vijeće ministara Bosne i Hercegovine i Ministarstvo pravde Bosne i Hercegovine da, u skladu sa Zakonom o državnoj službi u institucijama Bosne i Hercegovine, preduzmu mjere protiv Marka Kubatlije, direktora Agencije za unapređenje stranih investicija (FIPA), rukovodećeg državnog službenika, jer je na lokalnim izborima 2024. godine bio nosilac liste kandidata Demokratskog narodnog saveza

za Skupštinu Opštine Pale. Usvojena Inicijativa je 28. januara 2025. godine proslijeđena Vijeću ministara Bosne i Hercegovine.

U Obrazloženju predmetne Inicijative je navedeno da je, "članom 16. Zakona o državnoj službi u institucijama Bosne i Hercegovine utvrđeno da državni službenik ne smije obavljati dužnost, aktivnost ili biti na položaju koji dovodi do sukoba interesa sa njegovim službenim dužnostima, a naročito da državni službenik ne može biti član upravnih i drugih odbora političkih stranaka i ne smije slijediti instrukcije političkih stranaka. Državni službenik je dužan **da prilikom postavljanja na mjesto državnog službenika** predočiti sve informacije o djelatnostima i funkcijama koje obavlja. Državni službenik Marko Kubatlija u javnosti istupa kao predsjednik Općinskog odbora DNS-a, učestvovao je u izbornoj kampanji za lokalne izbore, iznosi političke stavove u medijima, a istovremeno kao rukovodeći državni službenik prima odličnu platu i ima službeno vozilo na raspolaganju 24 sata, kao i sve druge beneficije jednog rukovodećeg državnog službenika i direktora institucije Bosne i Hercegovine. Nesporno je da je Marko Kubatlija funkcioner političkog subjekta DNS, što je nespojivo sa poslom državnog službenika. Zbog svega navedenog, jasno je da Marko Kubatlija **u kontinuitetu grubo krši Zakon o državnoj službi u institucijama Bosne i Hercegovine**, te je potrebno da u što kraćem roku Vijeće ministara, u skladu sa članom 50. stav 1. tačka n. Zakona o državnoj službi u institucijama Bosne i Hercegovine razriješi Marka Kubatliju dužnosti direktora Agencije za unapređenje stranih investicija - FIPE.

Takoder, **Ministarstvo pravde Bosne i Hercegovine je dužno da preduzme zakonom utvrđene mjere protiv državnog službenika Marka Kubatlije i izrekne prekršajnu kaznu Marku Kubatliji u skladu s članom 63.a stav (4) Zakona o državnoj službi u institucijama Bosne i Hercegovine. Članom 63a. stav (4) propisano je da će se se novčanom kaznom od 2000,00 do 5000,00 KM kazniti rukovodeći državni službenik koji ne podnese ostavku na radno mjesto u državnoj službi nakon što je potvrđena njegova kandidatura**".

U trenutku prijave na Javni oglas za direktora FIPA-e, imenovanja na navedenu poziciju, pa sve do održavanja lokalnih izbora 6. oktobra 2024. godine, Kubatlija je obnašao dužnost odbornika DNS-a u Skupštini Opštine Pale, što je suprotno Zakonu o državnoj službi Bosne i Hercegovine.

Nakon što je Predstavnički dom Parlamentarne skupštine Bosne i Hercegovine usvojio zastupničku Inicijativu 23. januara 2025. i pet dana kasnije dostavio je Vijeću ministara Bosne i Hercegovine, Centralna izborna komisija Bosne i Hercegovine (CIK) je odgovorila na zastupničko pitanje Šemsudina Mehmedovića (akt broj 01-50-I-718/25 od 09.01.2025. godine) koje se također odnosilo na Marka Kubatliju i potvrdila navode iz predmetne Inicijative.

Centralna izborna komisija Bosne i Hercegovine je u odgovoru (akt broj: 05- 1 -07 -72-35-2/25 je dana 10.02.2025. godine) navela sljedeće: „Centralna izborna komisija BiH je odmah po saznanju da je Marko Kubatlija imenovan za direktora Agencije za unapređenje stranih investicija BiH, zatražila informaciju i dokumentaciju o njegovom postavljenju od Agencije i nakon toga je donesena Odluka o prestanku mandata i dodjeli mandata sljedećem kvalifikovanom kandidatu, broj: 06-1-07-1-2766/24 od 14.11.2024. godine, kojom je utvrđen

prestanak mandata odbornika Skupštine opštine Pale za Marka Kubatliju. Nakon toga, Zaključkom broj: 05-1-07-5-3702124 od 23.12.2024. godine, pokrenut je postupak utvrđivanja odgovornosti političkog subjekta DNS-Nenad Nešić i Marka Kubatlije, kandidata DNS-Nenad Nešić na Lokalnim izborima 2024. godine, zbog povrede člana 1.8 Izbornog zakona BiH. Odlukom broj:05-1-07-5-3702/24 od 21.01.2025. godine, politički subjekt DNS -Nenad Nešić i Marko Kubatlija kažnjeni su novčanom kaznom u iznosu od po 8.000.00 KM, zbog kršenja odredbe člana 1.8 Izbornog zakona BiH. Na Odluku o kažnjavanju je izjavljena Žalba koju je Apelaciono odjeljenje Suda BiH rješenjem od 30.01.2025. godine, odbilo kao neosnovanu.“

Predstavnički dom Parlamentarne skupštine Bosne i Hercegovine je dana 3.3. 2025. (akt broj: 05-07 -1-345-18/25) obaviješten da se na 71. sjednici, održanoj 20.2.2025. godine, Vijeće ministara Bosne i Hercegovine upoznalo se gore navedenom zastupničkom inicijativom Šemsudina Mehmedovića te da je zadužilo Generalni sekretarijat Vijeća ministara Bosne i Hercegovine da prethodno zatraži mišljenja nadležnih institucija, prvenstveno Ministarstva pravde Bosne i Hercegovine, Ureda za zakonodavstvo Vijeća ministara Bosne i Hercegovine i Agencije za državnu službu Bosne i Hercegovine kako bi Vijeće ministara Bosne i Hercegovine, po pribavljanju istih, moglo zauzeti konačan stav po predmetnoj Inicijativi.

I pored očitih dokaza da Marko Kubatlija u kontinuitetu grubo krši Zakon o državnoj službi u institucijama Bosne i Hercegovine, te da je prekršio Izborni zakon Bosne i Hercegovine, zbog čega mu je Centralna izborna komisija Bosne i Hercegovine izrekla gore navedene sankcije, Marko Kubatlija do danas nije razriješen dužnosti direktora Agencije za unapređenje stranih investicija, niti je Ministarstvo pravde Bosne i Hercegovine postupilo u skladu s članom 63.a stav (4) Zakona o državnoj službi u institucijama Bosne i Hercegovine, iako je bilo dužno to učiniti.

U skladu s članom 171. st. (2) Poslovnika Predstavničkog doma odgovor u pisanoj formi mora se dostaviti u **roku od 30 dana** od dana kada je pitanje dostavljeno onome kome je upućeno.

Zakonom o parlamentarnom nadzoru („Službeni glasnik BiH“, br. 25/18) propisane su sankcije za neodgovaranje na poslanička pitanja (član 64. stav (1.) tačka a) i b) Zakona.

Članom 6. ovog zakona propisano je da zastupnici provode nadzor nad radom institucija Bosne i Hercegovine postavljanjem zastupničkih pitanja, a članom 7. stav 2. istog zakona, utvrđeno je da se parlamentarni nadzor provodi radi preventivne zaštite od zloupotrebe položaja i ovlaštenja, materijalnih i finansijskih resursa.

S poštovanjem,

ZASTUPNIK PS BiH
Šemsudin Mehmedović

